

LIS PREDICJIS DAL MUINI

di pre Josef Marchet - Udin, 1965

Bocje, ce vûstu?

Pre Scjefin al è sbrissât jù pe strete di Macoràt, par colpe de nêf inglaçade, e si è discuinçât un pît. Cussì, par cheste domenie, o restin cence ni messis ni funzioms. O sai che a chei di Gargagnà di Sore no ur impuarte trop: ur dularès di plui se si ribaltàs il cjaruç di Cocolan che al mene la sgnape di Gurize pes ostariis.

Oh mo! Usgnot o sin in vot: un di plui di sabide stade. Al ven a stâi che e mancje mê comari Sese, ma e à mandadis lis sôs dôs fantaçutis. Bravis, chês stelis! O sêso vignudis di vuestre volontât? Parcè che sabide la fieste e je lade a finî malementri, là di Baduscli, nomo? A son rivâts chei trê bulats di Lupignan che a pratindevin di bandî lis balarinis plui bravis e la storie e je finide a sberlis e sclanfars! Mi à contade la part mê gnece Annalena, che e à un biel non par talian, une biele sassare sclaride cu la camamile, un biel "paltò" a cjampane, un biel nâs a patate sclave e un grum di ghiti di cjatâsi un fregul di morôs. "Ma là di Baduscli no si cjate nuie di sest", disè chê animute di agnul, Parcè no po? No isal simpri Rico Menat che plui di cuindis dîs a lunc nol fâs mai l'amôr cun chê pulzete stesse; e cussì, ancje se une sabide al è impegnât, si po sperâ che la sabide dopo al sei libar? E Gjovanin Corobule no isal infalibil, cun chel fîl di moschetute a francês vie, che al conte di vê fat zirâ la ciribicocule a dutis lis parisinis cuant

che al jere là vie fâ il svuatar intune locande di triste innomine? E Momi Semplon, fresc e taront come un purcit di grasse, che sô mari lu nudrîs di centuviel in salate e di latisûi in fersorie e so pari al spint, a mantignîlu dibat, i ultins carantans parâts dongje cul marcjât neri in chê volte de vuere? E chel frusin riçot di Risto Lomonico che no i va il mani e al cîr di ogni bande une ocjute che lu tiri cuc e lu mantegni? Tratantsi di meti lidrîs chenti, a chel no i impuarte nuie di cjoli une femine cence un voli o cence un braç o cence un pâr di dozenis di dincj in bocje!... E Tite Steche che, cualchi sere, co ju à curts, al rive adore di tornâ a cjase di bessôl cence colâ tal fossâl? E to fi Baldo, copari Panole, che vie pe setemane al odore di ledan siet miis di lontan e la domenie al intossee di colonie dute la vile?

Duncje, fantacinis, bocje ce vûstu? Aes fiestis di bal alî di Baduscli o veis ce sielzi: robe fine, int di sest, zoventût che e promet ben, frutats plens di implant; o veis la pussibilitât di imbastî relazioms di gale, di inmanîa fameis di aur, di preparâsi la felicitât par dute la vite. E voaltris, paris di famee, dismovêsi, navigait; se o volês cjatâ un brâf zinar che us scussi lis ainis,

mandait indenant lis vuestris passarutis e no menâlis in glesie a rumiâ
patarnostars! Buine fortune! E cun cheste us doi la buine sere.